

【六粗相】——《三藏法數》

（出起信論）

六粗，謂由業、轉、現三細而生，故名六粗。（業轉現，即第八藏識中初起之三相。以其微細，故名三細也。）

一、智相：謂依三細中第三境界相，不了自心所現，妄起分別染淨之相。於淨境則愛，於染境則不愛，是名智相。

（境界相，即三細中之現相也。）

二、相續相：謂依前智相分別，於愛境則生樂，於不愛境則生苦。覺心起念，相應不斷，是名相續相。

三、執取相：謂依前相續，緣念苦樂等境，心起著故，是名執取相。

四、計名字相：謂依前妄執，分別假名言說之相，是名計名字相。（假名者，虛假之名。謂依前執取相上，更立假名也。已上四相，皆論起惑。）

五、起業相：謂依前名字，執取生著，造種種業，是名起業相。

六、業繫苦相：「苦」即生死之苦也。謂業繫縛，則有生死逼迫之苦，不得自在，是名業繫苦相。